

DISSERTATIO MEDICA

DE EPILEPSIA.

Cujus veritatem, Deo duce & auspice Dei-Parâ,
in Augustissimo Monspeliensi Apollinis Fano,
publicis subjiciet disputationibus,

JOSEPHUS CASELLAS ET GINJAUME, ex oppido
vulgò Cervia, apud Hispanos in Gotholauniâ,
Diœcesis Gerundensis, Collegii Medicinæ
Gerundæ Collega, Philosophiæ Baccalaureus
Universitatis Cervariæ, & Medicinæ Monspeliensis
Universitatis Alumnus. Pro trimestri
julii anni 1791.

Ad primam apollinarem lauream consequendam.



MONSPELII,

Apud J. F. TOURNEL & J. G. TOURNEL, Universitatis Medicinæ
Typographos & Bibliopolas.

1791.

ILLUSTRI ADMODUM


GERUNDENSI SENATUI,

Studiorum fuorum primitias, &c. &c.

*C*ogitanti mihi, *SENATUS AMPLISSIME*, cui potissimum mea artis medicæ adserta dicarem, quemque Patronum eligerem, neque quidquam justius, neque prudentius, neque cordatius facere posse visum est, quam si lucubrationes meas, tibi offerrem, teque, *SAPIENTISSIME GERUNDENSIS SENATUS*, potissimum adsciscerem Mecænatem. Cum enim propter tua in me, & meos beneficia largè eollatâ non possem non significare tibi mei animi gratitudinem, tum pro illa singulari humanitate, quam jam tum à puero expertus fui, cum in isto Gerundenſi habendi Senatûs loco amplissimo me de humanarum litterarum calamitate dicentem benignissime audivisti, mihi locus non relinquitur dubitandi, quin hoc meum, etſi levidenſe, munusculum ſis libentiſſimo animo ſuſcepturus. Meos igitur hosce parvi ingenii mei fructus, quos in hoc celeberrimo Monſpelienſi ſcientiarum emporio, ubi ſemper medicina maxime floruit, colligere potui, tibi, *GERUNDENSIS SENATUS AMPLISSIME*, eâ, qua par eſt, animi demiffione dico, voveo, confecro, quos oro, benigne accipas in perennè grati animi monumentum,

Tibi addiſſimus,

JOSEPHUS CASELLAS ET GINJAUME.



DISSERTATIO MEDICA

DE EPILEPSIA.

§. I.

EPILEPSIA adesse dicitur quoties homo subito prosternitur amissis sensibus internis, externisque, cum concussu violento, involuntario musculorum omnium, vel aliquorum reciproco alternâ, cum requie, & novo paroxysmo.

Quamplurimis ab omni ævo insignitus fuit nominibus dirus hic morbus, qui momento ante sanos homines media inter vitæ munera prosternit. Undè non immeritò videtur vocasse *Celsum*, epilepsiam, *morbum sacrum*, vel quia à Diis immissus credebatur morbus, vel quia omne magnum vocatur quandòque sacrum. Morbum *Herculeum* vocavere veteres epilepsiam, quia *Hercules* illo laborasse creditur, vel quod magis conforme videtur uti innuit *Galenus*, ut morbi magnitudinem hoc nomine designarent; fortè etiam & ob curæ difficultatem, & quod *Herculeo* fere robore opus sit, ut miseri ægri paroxysmi tempore contineantur ne sibi ipsis miserrimè noceant. Viros quatuor robustissimos teneram virginem epileptici insultus tempore vix continere potuisse se vidisse refert *Van-Swieten*. Caducum mor-

bum vocavit *Paracelsus* quia dum hōc morbo corripuntur concidunt ægri. *Sonticum* vocavit *Aul. Gell.* vehementior quia hoc nomine intelligebatur morbus. *Divinum* vocavit *Platonus*, *Comitialem* *Plinius*, *matrem puerorum* *Schneideri*, *Analepsiam*, *Riverius*.

§ I I.

Magnâ tamen cum curâ prosequi debet medicus in epilepsiâ dijudicandâ, contingit, quia (& forsan non rarò) improbos homines se epilepticos in publicis fingere, ut largas fortè colligant eleemosinas, & ut suis in confabulationibus rideant quod ipsosmet medicos simulato fefellerint morbo. Casum habuit *Boërhaavius* in nobili juvene, sed pessimæ indolis, qui, si negarentur à parentibus quæ desiderabat, fingeat statim hunc morbum: dum autem vocatus jubebat chirurgus ut candenti ferro pedis pollicem tangeret mox exsilit, & postquam novit primo futuro paroxysmo esse cauterium applicandum non amplius ausus fuit morbum fingere. Similem alium refert *clar. Sauvages* de puellâ quâdam, quæ tam appositè hunc fingeat morbum, ut nemo in nosocomio generali dolum suspicaretur, quæ quidem interrogata num auram ex manu ad humerum, & indè ad dorsum & femur sentiret, affirmavit, præscripsit prædictus verberum usum quo audito sanata est.

§. I I I.

Accedendum nunc est ad varia miraque symptomata, quæ in epilepticis observantur paroxysmi tempore. Numerosissima certè hæc sunt, & cum maximè variant ratione non solum diversorum ægrotantium, sed in eodem etiam ægroto, & cum motus muscularis theoria hypothetice tantum declarata sit, perquam difficilem, & obscuram esse hujus rei cognitionem facile patet. Ea tamen recensere conabor, quæ ordinariò & frequentius observantur.

§. I V.

In omnium pessimâ epilepsiâ absque ullo præmonente signo subito prostrernitur homo cum internorum, & externorum sensuum abolitione, musculorumque convulsivâ agitatione. Validum plerique edunt ipso momento clamorem, cujus nullam conservant ideam, mirabiles tunc, variæque

convulsiones musculosarum partium sequuntur. Frons, capillataque capitis cutis miro quandòque agitantur modo, eriguntur pili, moventur supercilia, deprimuntur & ad se mutuò accedunt simul, oculi tunc fixi, tensi, prominuli ut in iratis apparent. Se vidisse refert *Tissot* epilepsiæ laborantis foeminæ oculos, visum irati subjecti egregiè representantes. Agitantur palpebræ, & clauduntur plerumque (raro tamen integrè) sed inter palpebrarum distantiam oculi album apparet, palpebraque superior in celerrimo, & continuo est motu, sæpè etiam & sub palpebris semi clausis oculi bulbi magnâ cum velocitate rotantur; undè nonnunquam vitium quoddam in oculis manet, & plurimos observamus luscis & strabones, qui epilepticis convulsionibus in primâ infantiâ tentati, hoc vitium contraxere.

§ V.

Maxilla inferior abducitur nonnunquam tantâ vi ut luxetur antrorsum; & dùm in paupere infante finito paroxysmo non fuerit restituta hæc luxatio, totâ vitâ mansit, qui postea multos annos vixit, sed fatuus, & in nosocomium receptus omnium certè commiserationem movebat. (*Van-Swieten*, tom. 3, pag. 397). Lingua tunc turgida & elongata ex ore hiantè prominet, & nisi adstantes subere, vel alio simili corpore molli maxillis interposito caveant, convulsivo motu ad se adductis maxillis lingua intercepta graviter vulneratur, vel pars ejus integrè abscinditur. Sat igitur frequenter contingit, paroxysmi tempore vulnerari linguam à morfu, & tunc horrendo spectaculo exit sanguis unâ cum spumâ: tunc dentium stridor ingratissimus percipitur, & non sinè horrore recordor, ait *Van-Swieten*, quod in sat tenerâ puellâ viderim dentium molarium fragmenta cum impetu exiliisse.

§. V I.

Caput miris flectitur modis, riget quandòque collum inflexile, pronum aliquandò incurvatur, ut pectori adhærescat maxilla, in aliis retroflexum hæret caput. Juvenem se vidisse refert *Tissot* qui hos insultus patiebatur frequenter, & per totum paroxysmum caput in sinistro habebat flexum latere & maxilla in humero fortiter adhærebat.

§. V I I.

Brachia etiam manus & digiti, magnâ cum violentiâ motus exercent flexionis, extensionis, abductionis, adductionis, rotationis, &c. Fortissimè

amen versùs manus volam adduci solet pollex , cum plures ha beat , & validiores musculos flexores , & versùs manum adducentes quam reliqui , quam flexionem nonnulli tanquam specificum epilepsiae characterem habent , cum tamen in aliis convulsivis morbis ab epilepsia distinctis nonnunquam contingat. In cruribus , pedibus , &c. licèt non adeò observari possint quia vestibus , plerumque teguntur , similes tamen esse ex eo constat quod pedibus validissime calcitent.

§. VIII.

Internarum partium agitationem similem esse docent ructus , borborygmi , fœcum , urinæ , & seminis sæpè involuntaria expulsio. Vitales actiones quam maximè etiam turbantur : in paroxysmi enim initio pulsus celeres , parvi , in fine verò majores , sed languidi ac tardiores. Respiratio pariter mirè turbatur , & impeditur nonnunquam ; in paroxysmi initio affici solent muscoli vocales , nam omnes cum clamore cadunt , oritur postea nixus validus respirationis ut in illis quibus suffocatio imminet. Omnes tunc conspicuæ venæ ut jugulares in collo , raninæ sub lingua , & præcipuè venæ frontis apparent turgidissimæ : incipit tunc livescere facies , imò ferè nigrescere , in primis circà palpebram inferiorem ubi laxa admodum est cutis , uti etiam circà labia , simili ferè modo ac fit in illis qui in laqueo hærent , ut notat *Van-Swieten ex Aretæo* dicens : *malæ rubent quidem , in*
» augmento autem mali & faciei livor accedit , cervicis vasa distenduntur vox
» ut in strangulatu aufertur : etiamsi vehementer inclames non sentiunt , eorum
» vox nihil nisi gemitus & suspirium est , & respiratio , & suffocatio , veluti
» in iis qui laqueo suffocantur.»

§. IX.

Circà paroxysmi finem periculosus adest status dum suffocatio imminet , & sic quandòque unicus paroxysmus hominem rapit. Post verò suffocationem illam imminentem , & spumæ expressionem ex ore ac naribus , minui incipiunt convulsivi motus , liberior fit respiratio , sed stertorosa cum somno profundo ; evigilant deindè ab hoc somno , illorum omnium quæ paroxysmi tempore evererunt immemores. Sensuum hebetudo , & memoriæ debilitas in multis manet , intra breve tamen tempus per bonum victum , & quietem refocillantur corporis vires , & sæpè tam perfecta redit sanitas ut nullum tanti morbi vestigium supersit , & post aliquod temporis intervallum

(nonnunquam sat longum) idem malum iisdem symptomatibus stipatum redit, tuncque chronica epilepsia vocabatur ab *Aretæo*; quando verò unico insultu hominem vel liberat vel perimit tunc ad acutissimos referebāt morbos.

§. X.

Paroxysmorum duratio, & inter binos paroxysmos intervallum, maximè in variis variant. *Barbette* loquitur de puellâ quâdam, quæ symptomata non habebat admodum vehementia, sed tamen per quatuordecim horarum spatium durabant. Aliis per integram horam; tamen commune axioma est, quod ex rarò contingentibus nunquam debent formari regulæ; adeoque communis, & magis frequens duratio est à decem ad viginti minuta. Quoad intervallum, sunt qui semel in anno corripuntur, alii vere, & autumnò; plures singulis mensibus insultum habent; alii qui paroxysmos plures intrâ viginti-quatuor horarum spatium patiuntur. Hæc consuetudo quidem sunt symptomata, sed variè in variis hic se exerit morbus.

§. XI.

Sunt etiam & signa, quæ morbi imprimis habitualis facti, accessum declarant. Huc pertinent capitis gravitas, vertigo, somnus vel nimius, vel inquietus & infomniis turbatus, horror & tremor totius corporis, frigus extremitatum, tristitia insolita, & anxietas præcordiorum, sensuum interiorum & exteriorum debilitas, & inconstituta affectiones, palpitatio cordis, urina cruda, pandiculatio & oscitatio frequens, subsultus tendinum, & convulsiones particulares, appetitus prostratus (*Ludwig*, medic. clin., §. 666) splendores etiam purpurei, aut nigri ob oculos versantur, ut in cælo iris prætenta videatur, aures sonant, fœdum odorem sentiunt, iracundi sunt, bilis præter rationem augetur. (*Sauvages* ex *Aretæo*).

DIAGNOSIS.

§. XII.

Diagnostica itaque signa præsentis epilepsiæ ad hæc bina reduci possunt sensuum nempe abolitionem, & perturbationem motuum muscularium; tunc enim agitantur muscoli convulsivis motibus ab arbitrio mentis minimè pendentibus. Quibus signis distinguitur à *catalepsi* in quo morbo sensus

abolentur quidem, sed corpus illum retinet situm, quem habebat primo accedentis morbi momento; à *paralyfi* in quâ flaxida immobilitas musculorum est; ab *apoplexiâ* quia in apoplecticis cum abolitione sensuum & motuum arbitrariorum adest imago profundi & perpetui somni absque convulsivis motibus; à *catocho* ex eo quod in epilepsiâ agitentur partes, & respiratio in paroxysmo sit frequens, interrupta & stertorosa, &c. &c.

DE CAUSIS.

§. XIII.

Sequitur jam ut dicatur de epilepsiâ causis observatis. Ex itaque dictis in præcedenti capite patet ingens diversorum symptomatum numerus quibus stipari solet epilepsia. Undè mirum ferè non videtur, quod morbus tam horrendis, & tam variis symptomatibus stipatus, originem suam à causis naturalibus majoribus ut diis, dæmonibus, iræ divinæ, incantamentis, aliisque similibus antiquis temporibus adscriptam sæpè fuisse. Constat tamen certò hunc morbum produci à causis talibus, quæ sensibus observantur, illarumque ablationem morbi curam absolvisse, Duplicem itaque distinxere medici epilepsiam, *idiopathicam* unam, *symptomaticam* alteram. Cùm autem *idiopathicæ* epilepsiæ causa in ipso encephalo hæreat, & cum intricatissimam encephali fabricam adhuc tam parùm noverimus, & ejusdem cognitio, & explicatio maxime obscura sit, sufficiet certè si observationes varias in *idiopathico* & *symptomatico* morbo cognitæ indicemus, & dijudicemus.

§. XIV.

His itaque positis consideramus in epilepsiâ abesse omnes sensus internos & externos, simulque eodem tempore fieri agitationes summas musculorum. Causa musculos movens ab encephalo per nervos derivatur in musculos; adeoque illo tempore dùm paroxysmus epilepticus adest encephalon motuum muscularium origo afficitur, ac per consequens causa epilepticum paroxysmum producens, debet efficere ut medulla encephali in nervorum origines validissimas motuum causas derivet. Ex quibus omnibus liquido patet morbi hujus causam proximam, integram & adæquatam paroxysmi tempore in encephalo hærare: undè optimè dixit *Ægineta* quod in encephalo ejusque ventriculis causam constitutam habet epilepsia; licet agnovit & à ventriculo, & ab utero, & ab aliis corporis partibus per consensum

sensum epilepsiam fieri. Illud enim morbosum in aliis quibuscumque partibus corporis hærens non producit epilepsiam nisi encephalon affecerit.

§. X V.

Verùm observatur quod post paroxysmum epilepticum jam sedatum , & cum encephali functiones in integrum sunt restitutæ, manet tamen ejus diathesis ut renovetur paroxysmus à causis talibus , quæ in aliis hominibus hanc diathesin non habentibus nihil tale producant. Ira, Venus, terror, & alia quamplurima epilepticis novum morbi insultum adferunt. Remanet ergò in hominibus illis causa prædisponens quæ facit ut tales homines absente paroxysmo remaneant obnoxii, ut denuò epilepsiâ corripiantur, si huic latenti causæ alia occasionalis sejunxerit. Adest præterea talis nonnunquam in sensorio communi dispositio, quæ à levi causâ accedente epilepticum insultum producit. Sic sana, & à sanis parentibus decem annorum nata puella per plures annos epileptica fuit, & primo paroxysmo correpta fuit, dùm joci gratiâ diù quædam puellæ sub plantis pedum titillarent, aliis illam immotam vi retinentibus ne intolerabilem ipsi hanc molestiam mutato corporis situ vitare posset. Quid morbose humoris hic culpari poterat? Quænam læsio capiti contingerat? Nulla certè; & semel turbatum sensorium commune, per nervos in extremis corporis partibus positos, retinuit impressam talem diathesim, quæ postea ab accedentibus aliis causis paroxysmum epilepticum renovabat. Si enim talis puella titillationis minas tantum intentare videret aliis mox cadebat epileptica. A levi iracundia, terrore, animi attentione parùm diutius protracta redibat novus paroxysmus. (*Van-Swieten*, tom. 3, pag. 402). Undè discimus quam parùm sæpè requiratur, ut latens illa diathesis epileptica denuò in actum deducatur.

§. X V I.

Certum est tamen sensorium commune non æquè firmum esse in omnibus hominibus, & in quibusdam irritari faciliùs quam in aliis. Sic duro labori ab ineunte ætate affuetus rusticus firmum corporis robur habet; dùm molli-ter educta puella à subito quocumque fragore convellitur. Undè intelligere videtur quare pro diversa dispositione sensorii communis, diversimode afficiantur homines, & illa quæ omnia in quibusdam turbant nullam mutationem inducant aliis. Tenera enim & mollis encephali structura in junioribus observatur, quam ob rationem huic morbo magis obnoxii sunt quam

adulti : videtur enim in illis excedentem magnitudinem encephali , & tene-riorem fabricam , facere causam prædisponentem , quæ levi causâ occa-sionali accedente epilepsiam præducit. Summa ira excandescens nutrix ubera præbet infanti imprudens , & convellitur illicò. Illa ergò mutatio per validum talem animi affectum in nutricis humoribus nata , non potuit firmitus ætate jam sensorium commune turbare , dùm pauculum lactis tene-rum , ac mobile infantis corpusculum tam misere afficit. Abdominis tor-mina , gingivarum tensio , & irritatio dentitionis tempore frequentissime insultus epilepticos junioribus inducunt , dùm sævissimam odontalgiam adulti ferunt absque epilepsiâ sequente,

§. X V I I.

Sequitur jam enumeratio causarum hujus morbi. In idiopathicâ itaque epilepsiâ , quæ ut plurimum summam capitis gravitatem conjunctam habet ad sequentia potissimum attendendum est. Sunt nimirum : mala capitis conformatio à nativitate , vel partu inducta , læsiones capitis vi illatæ , vel minus rectè curatæ , cerebrum in tegumentis suis , superficie , sub-stantiâ , ventriculis malè affectum per vulnera , abcessus , pus , saniem , lympham acrem , argentum vivum ad cerebrum quacunque viâ delatum , &c. Idem cerebrum malè affectum per inflammationem , corruptionem , ero-sionem meningum , à feri extravasationibus in ejus ventriculis , à lapillis , ossis fragmentis , polypis , &c. quas causas juvant omnia , quæ liquidorum in cranium affluxum augent , ut plethora , motus , calor , ebrietas , epulæ , venus , & alia. Innumerae aliæ sunt causæ , quæ in subtilioribus cerebri partibus occurrere possunt , & inæqualem spirituum influxum in organa sensus , & motus efficere.

§. X V I I I.

Symptomaticæ epilepsiæ plures pariter sunt causæ. In infantibus , quibus hic morbus frequentior est , §. XVI , acrimonia quævis in primis viis nata & hærens , vermes , & dentitio , præcipuè attendi merentur. In adultis interdum quoque epilepsia à vermibus observata fuit : aliæ tamen prætereâ recensendæ sunt causæ. Omnes violentæ affectiones generis nervosi , ut calculus membranaceus partes irritans , venena corpori applicata , in primis morsus animalis venenati , ut morsus tarantulæ , summus mali hysterici , & hypocondriaci gradus , interceptio nonnullorum quæ olim excerni solebant,

ut sanies, pus, menstrua, lochia, urina, &c. animi affectus & læsa phantasia, v. g. in veneris stimulo, terrore insigni, præcipué in prædispositis & sensibilibioribus.

P R O G N O S I S.

§. XIX.

Curationis ut-plurimum difficilis est epilepsia: sæpius nullam curam admittit. Si hæreditaria tanquam incurabilis habita fuit ab omnibus medicis; idiopathica & in primis habitualis facta rarò vel difficillimè curatur, symptomatice verò curatur sæpius. In infantibus facilius est ejus curatio quam in adultis; acquisitum enim corporis, viriumque augmentum, teneritudinem, & mollitiem encephali, & totius generis nervosi corrigit, eosque aptos reddit quo causis irritantibus magis resistent. Undè *Hippocrates* quando epilepsia ante pubertatis tempus apparebat sperabat morbum abiturum, ubi autem post vigesimum-quintum annum invadebat, tunc ut-plurimum ad mortem usque manere insanabilem monuit.

T H E R A P E I A.

§. XX.

Pertractatis illis, quæ ad diagnosim, causas, & prognosim epilepsiæ spectant, sequitur ut aliqua dicantur de ipsius curatione. Diversissima remedia, diversissimamque curandi methodum ad hunc morbum requiri pro notâ varietate causæ, loci, &c. liquido patet. Tanta certè est rerum dicendarum copia, ut si remedia pro unâquâque causâ epilepsiam producente indiscriminatim recensere vellemus dies noctesque opus essent: cum verò brevitati studeamus in aliquibus tantum immorabimur, & illam quæ magis conformis videbitur curationem pertractabimus, ex quibus reliquæ curandi species immediate, vel spontè fluant.

§. XXI.

In juniore ætate frequentior occurrit hic morbus, uti antea dictum fuit; à diversissimis tamen causis natus. Sic nonnunquam lac coagulatum ab acido in primis viis hærente epilepticos insultus producit teneris infantibus, quo in casu remedia illa, quæ acre illud enervare valent, & talem saburrâ

subito è corpore expellunt optima sunt antepileptica. Dentes etiam eruptionem tentantes gingivas irritant, inflammant, &c. Ex quibus oritur nonnunquam insultus epilepticus, & tunc illa quæ dentium eruptionem possunt facilitare ut chirurgi lanceola gingivam dissecans optima sunt antepileptica. Si à veneno assumpto, & in ventriculo adhuc hærente hic morbus producit, patet evidenter illam requiri curam per quam vel expellitur hoc venenum, vel sic enervatur, ut amplius nocere nequeat. Si ab interceptis nonnullis, quæ antea excerni solebant hic morbus producit, optimum remedium est ut illa intercepta prodeant ex iisdem locis per quæ antè morbum exire solebant. A vermibus productam epilepsiam præmissâ purgatione ex pulv. cornachin. & mercur. dulc. parata, solo usu pulv. sem.)a. curatam vidi.

§. X X I I.

Omniū medicorum spes in epilepsiâ curandâ tantum consistit ut magna mutatio inducatur corpori: verum non determinaverunt quid in epileptico mutandum esset ut fieret sanitas; sed corporis præsentem conditionem, conantur tantum mutare in aliam: observaverat *Hippocrates* circa pubertatis tempus, quando miro adeo modo totum corpus mutatur epilepsiam quandoquæ cessare. Commendavit ideò mutationem regionum, & vivendi generis ad hunc morbum tollendum: *Van-Swieten* se vidisse ait epilepticos, qui in Indiam orientalem transigraverant, immunes postea fuisse ab hoc morbo. In aliis etiam corporis mutationibus magnam ponunt spem. Sic morbi corpus validè mutantes epilepsiam sanasse ex historiâ medicâ constat. Undè testatur *Hippocrates*. Quartanâ laborantes magno morbo non capiuntur, si prius autem capiantur & quartana superveniat, liberantur; quod quidem recentiorum etiam observatis confirmatur.

§. X X I I I.

Ingentibus atque valentissimis medicamentis in morbo comitiali opus est, inquit *Aretæus*: undè medici nonnulli, causam valentissimis remediis corpus turbando, ut fortissimis purgantibus, & emeticis delere tentaverant, non semper ut materia morbi expelleretur, sed ut præsens conditio, quæ morbum fovebat, fortè mutaretur à turbis tantis in corpore excitatis. Antimoniatis & mercurialibus remediis alii ob eandem causam usi fuere. Mitioribus alii, sed talibus quæ per totum corpus mirabili vi penetrant. Sic

octenni puellæ decem moschi gr.â repetitis vicibus pulchro cum successu dedit *Vanswieten*, & per plures dies saliva, urina, sudor moschum redolebant. Cl. *Massa*, Romæ medicinæ professor, vidit decem & octo annorum puellam, bilioso præditam temperamento, quæ post plures accessus quotidianæ febris in quotidianos & terribiles epilepsiæ insultus venit, remediis quamplurimis frustra tentatis matutino tempore antequàm accessu corripere-
retur sequens præscripsit. *℞ mosch. g.â x. nitr. antim. ʒj extract. camomil. q. s. f. bol.* Superbibendo infusum the: insultus retardatus fuit; reiteravit crastinâ die præscriptum, & non ampliùs visus est accessus.

§. X X I V.

Crato cinnabarim nativam tamquam epilepsiæ magnetem commendat hoc modo exhibitam. *℞ cinnab. nativ. opt. subt. trit. ʒ℥. corall. rub. pp. & marg. ppâ ʒj croc. opt. ʒj. fol. aur. n°. xx. f. pulv. subtil. dos. ʒij. cum julap. cephal.* Succus rutæ multum etiam laudatur ad epilepsiam, ideòque ejus extractum iisdem pollet viribus, & commodiùs sumi potest. Electuarium peruvianum epilepticum *Fullerii* est certissimum, & præstantissimum antepilepticum, ut experientia me docuit (inquit *Fuller*) post debitas evacuationes adultis dosis sit ʒj mane & vesperi per tres vel quatuor menses, & postea per triduum vel quatrimum ante novilunium & plenilunium.

§. X X V.

Eximiae vires radicis valerianæ sylvestris à *Fabio Columnâ* prædicatæ, & à *Riverio* memoratæ aliorum etiam experientiâ confirmatæ sunt. Dr. etiam *Marchand* maximè laudat usum valerianæ sylvestris propriis ductus observationibus. Primus enim cui talem usum præscripsit fuit juvenis 16 annorum, qui à 7°. ætatis anno singulis hebdomadibus corripiebatur accessu, & sanatus fuit. Alius 20 annorum unoquoque mense accessum patiebatur dimidiæ horæ, & fuit simili modo sanatus. Homo etiam qui à primis conjugalibus deliciis, epilepticis accessibus corripiebatur frustrâ tentatis quam plurimis remediis usu radicis valerianæ pulv. & ejus infus. liberatus fuit. Infinita leguntur apud auctores observata, confirmantia, inter specifica antepileptica palmam præripere valerianam.

§. X X V I.

Aurantiorum folia tamquàm specificum antepilepticum à quamplurimis

celebrantur. *Clar. de Haën* (*part. 5, cap. 4, §. 3.* qui circa hanc rem conferri, meretur) loquitur de puellâ decem & octo annorum accessus patientem horrendos, quæ perfectè curata fuit à tali usu. *Dr. Locher* omnia alia specifica rejicit, ille enim dictis foliis æquivalentem non invenit; moderant illæ accessuum violentiam aliquibus; accessus retardant aliis; & quam plurimos denique sanavere. *Hannes* epilepticum infantem prædicto curavit usu, quandò aliis omnibus resistebat morbus. Alia quam plurima recensentur specifica, ut *kina, camphora, castoreum, opium, assa fætida, antimonium, ongul. alcis, cran. human., peon., visc. querc., lumb. terrest., flor. sal. ammon. & ejusdem spiritus, diætæ lactea, vesicatoria* cum maximam feri partem subducant conferunt etiam, &c. quæ omnia figillatim exponere nimis longum foret.

§. X X V I I.

Pitcarnius post vomitorium repetitum, & vesicantia tincturam antepilepticam sequentem laudat. *℞ rad. valer. sylv. & dictam. alb. āā 3vj castor. & ster. columb. āā 3℔ visc. querc. 3vj cinnam. & summitat. ror. marin. āā 3℔ fol. sen. 3ij jalap. & turpet. āā 3℔ infund. frigid. per dies x. in vino alb. gall. lib. viij col. ad. pulv. cran. human. & ungul. alc. āā 3j saccar. 3iv cui rite immis. ol. succin. ℥iij spir. cast. 3ij dos. 3iv.*

§. X X V I I I.

Boerhaavius contulit primò quod æger vesperè per semi-horam balneum ingrediatur aquæ calidæ ad crura usque; quod partes siccatae fricentur panno laneo sicco calido, tunc quod plantæ & dorso pedum applicentur emplastra die nocteque gerenda excepto tempore balnei, ex gum. ammon. bdel. galb. & oxycroc. 2°. Mane & vespere fortis extensio tarfi, interdiu moderata deambulatio. 3°. Bis in mense triduo antè novilunia & plenilunia purgetur haustu, qui recipiat cinnab. g.â x. resin. guajac. g.â v. rhæi 3℔. scammon. g.â vj stib. diaphor. g.â xv. in syr. de cichor. comp. 3vj & aq. cichor. 3ij. lisdem diebus & pridie paroxismi post balneum vespertinum inurgantur pedes oleo spicæ. 4°. Cæteris diebus mane bibat jejunus haustum ex infus. theiformi. rad. pæon. valer. sylv. āā 3℔ rutæ recent. 3ij. die vero purgationis hora sexta vespertina paregoricum sumat ex syr. diacod. 3vj tinct. opii gut. viij in aq. stillat. papav. rhæad.

§. X X I X.

Si signa quæ insultum epilepticum præcedunt observantur, tunc ille fortè præcaveri potest. Sunt enim qui frigidam auram ex aliqua corporis parte venire sentiunt & ubi ad præcordia pervenit insultu statim corripuntur, sed si adstantes strictè ligando illam partem impedire possunt illum ascensum, impediuntur paroxysmi uti toties observatum fuit. Dubium illud quod haberi potest in cognoscendo epilepsiam an idiopathica sit, vel symptomatica solvi fortè potest dum medela adhibetur parti, quæ prima afficitur instante paroxysmo: si enim fricando, premendo, vel ligando hanc partem paroxysmus impeditur vel multum retardatur, tunc novimus encephalon idiopathice affectum non esse, sed affici à morbi fomite in illo loco hærente. E contra si absque ullo effectu topica talis medela tentata fuerit, tunc meritò concluditur idiopathicam esse epilepsiam. In idiopathicâ etiam epilepsiâ non semper signa incipientis paroxysmi in eadem corporis parte observantur, sed in variis, dum è contrâ in symptomaticâ epilepsiâ ab eodem corporis loco semper primum morbi initium oritur. Adeoque in symptomaticâ epilepsiâ destructio illius partis ubi initium sumit paroxysmus optimum est remedium.

§. X X X.

Summâ etiam cum curâ inquirat medicus quisnam locus in corpore observetur in quo prima signa instantis paroxysmi deprehenduntur, dein accuratè notanda omnia symptomata, quæ à paroxysmi initio ad finem usque apparent, & quo ordine sibi mutuo succedant; observandum pariter quo anni tempore paroxysmi frequentiores, vel validiores fuerint, an circâ novilunium, vel plenilunium contingant, quid boni, vel mali egerint consuetæ evacuationes menstruorum, hæmorrhoidum, sudoris, &c. quid venti, æris remperies, meteora effecerint in hoc morbo. Indagandum præterea quid fecerint usus sex rerum non naturalium gesta, ingesta, &c. ità toties observatum fuit iram, bacchum, venerem, mærorem animi attentiuem paroxysmos induxisse.

§. X X X I.

Firmissimè credo quod si medici omnem animi attentionem hîc adhiberent quam plurimos sanarent epilepticos, vel saltem levamen adferrent. *Galenus* dum in grammatico juvene paroxysmum nasci observabat, si mediam pateretur, bucella panis data tantum poterat præcavere malum.

Vidisse, ait *Van-Swieten*, epilepticum juvenem, cui antè paroxysmum incipiebat tremere labium inferius, & mox cadebat epilepticus, & si paroxysmi tempore vomebat brevi fiebat insultus. Cum autem singulo mense circa plenilunium morbi insultum pateretur datum fuit vomitorium lene omni mense triduo antè plenilunium & eodem die vespere diacodiatum leve; reliquis diebus roborantibus utebatur remediis, & sex mensium spatio tali usus medelâ, liber evasit à morbo. Alius etiam qui ante paroxysmum, dolorificum in cubito dextro sentiebat spasmodum, præscripsit. Cel. *Locherus* vesicatorium cubito applicandum; hoc quamdiu fluxit fiebat morbus, qui vesicatorio ficcato revertebatur; vesicatorium apertum servavit per mensem, data est interne kinakina cum camphorâ & æger convaleuit.

§. XXXII.

Cum autem ex dictis constet adeò variâ specie hunc morbum apparere, & à tam diversis, & numerosis causis produci, facile patet non posse ullam generalem curandi methodum statui, sed indicationem curatoriam erui debere ex cognitione causæ morbi, quæ sollicita observatione omnium quæ in singulis ægris occurrunt tantum haberi potest. Magnam igitur esse debere medici curam in indagandis causis, undè hic morbus ortum ducit facile patet, cum unaquaque suam postulet curandi methodum; quod enim uni prodest, sæpe alteri nocet.



ARGUMENTABUNTUR
ILLUSTRISSIMI PROFESSORES
D. PAULUS-JOSEPHUS BARTHEZ, *Universitatis*
Cancellarius.
D. GASPARDUS-JOANNES RENÉ, *Decanus.*
D. ANTONIUS GOUAN, *Pro-Decanus.*
D. FRANCISCUS BROUSSONET.
D. FRANCISCUS VIGAROUS.
D. HENRICUS-LUDOVICUS BRUN.
D. HENRICUS FOUQUET.
D. JOANNES-BAPTISTA-TIMOTHEUS BAUMES.